



**Информант: Баллеева (Акманаева)
Антонина Петровна,**

вордиськемын 1932 арын 14 августэ Верхняя Шунь гуртын.

Туннэ мон куноын Баллеева Антонина Петровна дорын. Тоня апайлэн пинал дырыз тупам кышкыт война аръёсы.

- Умоесь-а, Тоня апай, мынам тодэме потэ вал тилесьтыд ортчем улон сюрестэс. Кытын но ку ти вордиськиды?

- **Мон вордиськи Шыньыл гуртын 1932 арын 14 августэ. Семьямы 6 кузя нылпиос вал, нош мон куинетиез: Педисся-1925 арын вордиськем, Насьта -1928 арын, мон, Коля – 1935 арын, Паня – 1938 арын, Миша – 1941арын. Али мон но Педисся апае гинэ сол ини.**

- Жугиськон кутскем иворез ти кызьы но кытысен кылиды?

- **Ма мыным соку 9 арес-а мар-а гинэ вал али. Семьямы анайёслэсь вераськемзэс кыли. Атаез жугиськонэ келяло шуыса. Кык пол жугиськоньсь бертэм атай куинетиез кошконо луиз. Анае бордыса келяз, та мында пинялэн но басьто-а МА шуыса. Эшшо ке Мишаен зок кылиз. Миша со атаез уг тоды, со бере вордиськиз ай. Кыктоос вал соос, одигез кулыса вордиськиз, ныл вал. Мынам но висьтэм времеа. Кырзаса келяло гой, мыным шулдыр. Мазэ-созэ уг валаськы.**

- Тоня апай, уд тодиське-а, кошкем бераз атайдылэн кыче ке иворъёсыз ой вал-а?

- **Тодисько, одиг гинэ гожтэтэз вал: «Кукмороти кошкисько, корт изьы изьятизы. Татьяна, тон зеч мозмид-а? Уг тодиськы, сол кылём медам? Зеч луэ». Со гожтэт**

анайёсы дорын, Акманай Митрейёс дорын, али но вань, пе. Вось книгаос полын бинялтыса, пе, возиськом. Одиг гожтэт сяна, мукет но кыче иворез ой вал ини. Вось бертэмзэ витиськом, али но витиськом... Атаелэн выныз но оз берты жугиськоньсы. Со берлогес кошкиз али, анаелэсь кулэм нунызэ со ватиз.

- Школаын дышетскыны кылдиз-а тиледлы?

- Ныль класс дышетски. Гожъяськыны кагаз но ой вал, газетесь чурьёс виски но мар гожъяськом вал ини. Съод вуэн, пераен гожъяськиськомы вал. Съод вулы порошок вузаске вал кебитын. Куддыръя эгырен но лэсьтылимы. Жоккышет тоды куэм дэралэсь луоз вал. Анай весь даллаше вал, ваньзэ съод вуэн саптаса быдтиськоды шуыса. Мон дышетскыны ляб вал, милям Насьта но Паня умой дышетскизы.

- Кызьи улиды жугиськон арьёсы, маар сииды?

- Тодэ вайыны кутски ке, синкылиос асьсэос пото. Коркасьсэ но, колхозысь но ужаса вуоно вал. Тужгес но секытлуиз ини анайлы. Милемыз ваньмесыз сюдыны кытысь ке но маар ке но шедьтоно гой. Огмы но сютэм ом кулэ, инмарлы тау. Анай пыдысьтыз кутсэ но уг кушты вал ини. Вазь чукна скал кысконо, пудоосыз сюдоно. Собере колхоз уже кошконо.

Мар сюре, соин котэз тыриськом вал. Анайлэсь кисыяз нуллэм зегзэ тордытыса, кораса, кеньыркарьськом вал. Подсобное вуытозь крахмал бичаны ветлиськиз. Чуньбыжез, тисё пот турынэз, крахмалэз куасьтыса, изыса, нянь пыжиськом вал. Куд ог дыръя гинэ одиг кырым нянь пызь пизь на вал анай. Соку нянь туж ческыт потэ вал. Пудо трос вордим ке но, асьмелы сиины зазегъёс но курегъёс гинэлуо вал ини. Одиг пол-амар-а вож кунянэз вандим ик. А бадзым куняньёсыз уг яра шуэ вал анай, сюлме воез, пе, кынме. Мугез мукет вал, дыр, ини, милемлы озы шуэ вал. Атайлэн валэз трос вал. Ваньзэ келязы. Жугиськонэ, дыр. Толяськон понна но трос пудоез поттыса кошко вал, или тюрьмае келяло. Кисыязы пичи гинэ юэн сюризы ке но, тюрьмае келяло. Калёк Очан, Камаш Матран, Шана Манялэн анаез тюрьмае кулизы. Шана Манёклэн анаез сярысь мынам анай весь вера вал. Огпол чош кутсээн кутсаськиллям но, кисыязы дю басьтиллям. Табере бертиськом, пе, ини: Писёк кышно, милям анай но Шана Манёклэн анаез. Кыдёкысен адзиллям – уполномоченной лыктэ. Шана кышно кышкаса беренги колхоз базэ пегзем, анайёс бертыса кошкиллям. Уполномоченной, та огшоры оз пегзы, дыр, шуыса, базэ пырем но шана кышноез кутэм. Тюрьмае келязы, отысь оз берты ини. Пинальёсыз асьсэ понна кылизы.

- Тоня апай, нош ти, 9 арес нылаш, кытчы ке ужаны ветлиськоды вал-а?

- Уд, пе, ветлы, но кытысь но уг кельто вал. Гужем пось луэ вал. Со пось куазен колхоз зегез уриськом, туж посяса бертиськом. Кытчы гинэ быгатиськом, отчы шыпет шыписьком вал ини: Беренгиюке, Бекриюке, Шактанюке. Асьмелы пыласькыны но умой, пудоослы но кулэ. Улвайёс но суйёс тырыса, корт куен шыписьком вал. Сизылы вуиз ке, зег йыр бичаськом вал. Адильлэн из корказ Сёсён Колялэн анаез сиён посьтэ вал. Олома кузьда жок вал отын, туж ческыт потыса сиськиськом вал. Тулыс вуон азын бусые канул кырылим, дюэз медаз кыр.

**Коркалы быдэ пень октиськом вал. Сое люкаса тыриськом фермае. Жомытэн кын
вылти бусые пень кисьтаны мыниськом. Кын шуназ ке, пыд котме кутэн.**

-Коркады кезыт уг луы вал-а? Маин эстиськоды вал?

**- Корка туж кезыт луэ вал. Собере анай плита муръё поттиз, шунитлуиз. Куроен
эстиськом вал, анай нюлэскысь пу но нуллэ вал. Мон пулы ой ветлы. Шынэ гинэ
кут кутан нинлы ветли. Сое шильяса, кут кутан дышетски. Шакта бабай дышетиз.
Укмысо, куатё, витё карыса кутасько вал. Атай кошкем бере, Насьта коскорта понэ
вал. Мон сое понын ой дышетскы.**

- Туж бадзым тау тиледлы, Тоня апай. Кема аръёс чоже висытэк улыны мед кылдоз. Мар
ти верасалды туалы нылпиослы?

**- Ниноку но жугиськон медаз лу ини, Инмар мед утёз сыче кышкытлыклясь.
Милесьтым адземмес пинальёс медаз адзе.**

Вераськиз Сутэр-Починка шор ёзо

Школаысь дышетись

Яковлева Людмила Пантелеевна.

26. 02.2014